



LAMEPA

**LOMIGA
NOVEMA - TESEMA
2020**

EKALESIA FAAPOTOPOTOGA KERISIANO I AMERIKA SAMOA

VALAAUINA PEA LE 'AUFALGALUEGA GALULUE

ANOTUSI

Valaauina Pea le 'Aufalgaluega....	1
Mai le Fa'atonu	2
Fonotaga a Komiti Ianuari 2021	2
Taulaga Seminare	3
Lauga Kerisimasi	4
Mafaufauga Faaleagaga	6
Ativeni mai le Perofeta o Ieremia	7
Tala mai Seminare i Kanana Fou	8
Tala Aoga Mauuluga i Kanana Fou	11
E Lelei mo Oe	11
Aufalgaluega Agavaa mo le Galuega Tausi 'Aulotu	13



Rev. Kautoa ma le faletua Sita Moloti, filifilia EFKAS Nua ma Seetaga



Ierome Tai'i AKF ma le faletua Senira, faifeau filifilia EFKAS Ofu, Manuatele

manino ai, "E te alu i le nuu ou te fa'asino atu ia te oe, e fai ma ou nuu"

O le faasinomaga lea o gafa o le tala lelei, na patilima ai le soifua fa'afetai o le EFKAS i Nua ma Seetaga, ina ua tata logo ma alagaina le saunoaga a le Susuga i le Toeaina o le pulega, a o le Ta'ita'ifono o le Fonotele a le Ekalesia Aoa, Faaetete Saifoloi F.T. "O le aso o le osigafeagaiga a le Susuga ia Kautoa Moloti ma le faletua ia Sita ma le Ekalesia EFKAS Nua ma Seetaga"

O fa'amoemoega ua taunu'u, aua ua leva ona fa'agafua le Ekalesia ma so latou tofi, peitai, ina ua tasi le tofa ma le fa'autaga i le Ta'ita'ifono ma le laulaufono, se tofa momoli i aiga, ma faia ai le faiga filifiliga ma ifo ai le fuiniu i le Susuga ia Kautoa ma le faletua ia Sita Moloti.

Na ta'ita'i lava le Susuga i le Toeaina o le pulega i le sauniga, Faaetete Saifoloi, fa'atasi ai ma le lagolagosua a le aufalgaluega tofoti a le pulega, aua le fa'amapueina o le fa'amoemoe o le Ekalesia, ina ia maua ai sona viiga.

Sa mamalu foi ma mauuluga le fa'amoemoe, aua sa mafai ona auai atu i ai le Susuga i le Failautusi o le Ekalesia Aoa, Rev Nafatali Falealii, fa'apea le Teutupe, le tofa ia Poialii Fiasili Haleck.

O le afiga i le Ta'ita'ifono ia Paepae Faii, sa saunoa e avea ma sui o le Ekalesia, e fa'ailo foi le fa'amoemoe, ma le filiga i le tai, mo so latou tofi, lea ua tasi ai le lamaga ia Rev. Kautoa ma le faletua.

Sa saunoa foi le Susuga i le Fa'afeagaiga ia Kautoa, ma ia fa'aalia ai le agaga o le fa'afetai i le Atua, ina ua fa'aalia lona finagalo tofoti, lea e pei ona ua filifilia ai i laua e tausia lenei Ekalesia. O le Susuga ia Rev Iese Aasa mai le Ekalesia EFKAS Amanave sa laugaina le upu, lea na ia fa'amamafaina ai le Fetaliga a le Atua ia Esekiel, e alu i Ierusalem e talai atu i ai lona finagalo. Na matua mafatotoga lava le Ekalesia fa'apea mafatotoga lava le Ekalesia fa'apea le faifeau i le upu fa'amalosi, aemaise o le fa'asaga atu o le Faifeau ma le faletua i le galuega fou.

O le susuga ia Kautoa, o se faifeau mai le atunuu o Tuvalu, sa a'oa'oina i le Kolisi Fa'afaiifeau i Kanana Fou i lona fa'aailoga o le BD, ona se'e ane lea ma galue i le ofisa o le Ekalesia i le vaega o tupe, ma e filifilia nei, o lo'o galue ai i le ofisa Tutotonu, a'o lona faletua, sa faiaoga i le Aoga Mauuluga a le Ekalesia i Kanana Fou High School.

Na maea le sauniga, ona se'e ane lea i le fale fa'asausau (hall) a le Ekalesia mo fa'aaloaloga masani, aua pelega o le Faifeau ma lona faletua mo le Pulega ma le Matagaluega, ma na matua sopo o'oo'o fa'aaloaloga i le mamalu sa auai. O le tofa i le Tauto'oto'o ia Gago sa avea ma fofoga o le aso, ona fa'aiu ai lea i le tatalo ma taape ai le fuamanusina.

O le masina o Ianuari ua fa'amoemoe e momoli ai le Susuga i le aoa ia Ierome ma le faletua ia Sinira Tai'i, lea ua filifili e avea ma faifeau a le Ekalesia EFKAS Ofu. Ua loa tausaga o tu'ufua le galuega a le Ekalesia Ofu, ona o fuafuaga sa tau fa'amaea a le Ekalesia, ma mapu ane ai loa i le latou palota, ma ua filifilia ai le Susuga i le A'oa'o ma le faletua e avea ma o latou faifeau.

Tatou te talitonu pea i le fa'asinomaga a le Atua i le soifua o lana aufalgaluega, aua o la lava na te filifili ta'ito'atasi le au galulue, ina ia fai ma so'o e talai atu le tala lelei i nuu uma.

Mai le Fa'atunu

E fa'atalofa atu i le mamalu o le Ekalesia fa'apea ai ma 'aiga lotu i lenei taeao i le agalelei o le Atua, e fa'apea foi le atunu'u i ona ta'ita'i ma ona tagata. Sa tao'oto ma manū e le fati faapea ai mala e atia'e peita'i, o le a'ao fa'alooaloa o le Atua laveai ua fesilafai ai i tatou i lona alofa ma le agalelei. Talofa, Talofa lava.

O upu lava a tamaiti pe'a amata le a'oga, o le tū sa'o, ma usu le pese, (Samoa Tutoatasi)

'Samoa tulai, ma sisi ia lau fu'a, lou pale le lea.

Vaai ina fetu o loo agiagia ai, le fa'ailoga lea o Iesu na malii, ai mo Samoa,

Oi Samoa e, u'u mau, lau pule ia faavavau ...

O ni sa'afi'afiga e manatua ai lo tatou Alii fa'aola, o le Emanuelu, o le Keriso e pei ona valoia le togiola e fa'aolaina ai i tatou. O lenei ua pepese ma fiafia ma le faatalitali i lo tatou Alii fa'aola i le aso Kerisimasi, ua tatau mōli emoemo, o le logo ua tautau mai i faitotoa o fale, o nisi mōli e pepese ma faailoa mai musika o le aso kerisimasi, o le pulou mūmū ma ofu o le alii e tufatufa mai mea alofa, o pu ua laulogo le faailoa, o pesepesega a aulotu i afiafi, o tala i le fanau mai o le tama o Iesu, faapea Maria ma Iosefa. O le logo ua tā, e ulufale tagata uma i le tapua'iga i le Atua, ma feofofoa'i i le fanau mai o lo tatou faaola, Merry Christmas, and happy New Year.

Ioe, e ese le tāua, e mānatua ai pea o lo tatou mālō, o le fu'a o lo'ō agiagia ai le faailoga o Iesu, na malii e Togiola ai i tatou. O le viiga e pei ona faailoa le tapuaiga i lo tatou Atua, o le tuuina atu o le ola ma le malosi atoia i mea ua tatou maua e avagalima ai le tautuaina o lona finagalo.

O le aso mo meaalofa a mātua i fanau, faapea foi fanau i mātua. Na ou vaavaai atu i le upega-tafailagi, i le afafine a si ou atalii o loo nofo mai i lo matou aiga i Samoa, ia ua manuia lona taumafai ma ua talia i le Kolisi o Samoa, i le tausaga fou. O le meaalofa sili mo tatou mātua, i le Kerisimasi ma le Tausaga fou, pe'a manuia le taumafai o tamaiti.

E molia le agaga faafetai i le Ekalesia, ona o le avanoa na faaaogaina ai o lenei auauna e tautua ai i le Ekalesia ma ana feau. E lagona le faatauvā'a ona o se auaunaga sa faatino, e faamalie atu ona ua pau o se mea ua oo iai le mafaufau. O le silisiliese o le Alii na pipii pea i ai i lana Tulafono, o ana tusitusiga ma perofetaga, o lona Agaga faapea le Togiola ua faia e Iesu, sa faavae ai le auaunaga. O le agaga lea e molimoli atu ai le agaga faafetai i le Ekalesia ma le Laulau a le Fono Tele, susuga i Komiti, le Komiti a le Au Toeaina, faapea foi mafutaga eseese. O le galuega tele e le tuua ae faaauau, e toululu le fuga ma mamae le mutia, o le mafuli a le puou e toe tupu, o le popouli e pa'u ae toe tupu, ma o le viiga lea i le Alii e le aunoa e ala ia Keriso Iesu..

E faapea foi le agaga faafetai i susuga i Faifeau ma Faletua, i faifeau, i Aoao faapea Afioga i Tiakono, malo le taupati faapea le saili. E iai taimi e fiafia ai faapea taimi e feeseeseai ai, o le taimi ina ua le tagolima le auaunaga, a o le faanoanoaga tele, ina ua tuua mafutaga i le malii ma le oti. O le Alii lava lo tatou taitai sili, ua uma ona ia faia le Togiola e faaolaina ai i tatou.

I lenei taimi e faamalulu atu le auauna, i tusitusiga sa tuuina atu mo a tatou faigalotu i aso taitasi, e faapea foi ona faailoa o galuega a le Ekalesia, o le Atua lava e faatele atu o lona Agaga e agatonu ai le auaunaga ina ia maua le agaga e tonu ai lau tapuaiga. Sa ou galue faiaoga i le Kolisi i Malua, avefa ma Faifeau i Vailima ma le Kolisi o Papauta, Faatonu Aoga Mauualuluga a le EFKS, avefa ma Faatonu o le Lamepa EFKAS. O lenei o le a se'e i fanua le va'a o le tau-tai, faafetai i le Ekalesia ma le faaaogaina o le ola mo ana feau. O le upu lava a toeaiina – 'e toe foi lava le toloa ma mapu i si ona vaivai'.

O moomooga le uma mo le au faigaluega a le Lamepa, ae maise uso ma tuafafine sa nutimea faatasi, Lau afioga i le Failautusi Aoao a le Ekalesia, Lau afioga i le Teutupe Aoao a le Ekalesia, le Laulau a le Fonotele. i le Susuga I le Taitaifono Aoao faapea ai ma le Sui Taitaifono, o le mamalu lava lea o le Ekalesia Aoao. O le loto fiafia ma le agaga faafetai ona o le Ekalesia sa galue ai, ia faatupu atu e le Atua le utu a le faimea.

O upu lava a le pese e manatua pea;

*'E auau le tava'e i ona fulu,
ma le tama fou i lona atunuu,
ua ala ai ona tu'ua o aiga,
fia fai ma soo o le Tupu.*

Ia manuia tele le Kerimasi ma le Tausaga Fou i le alofa o le Atua. Soifua ia,

Livigistone Nu'usila Samuelu. F.S.
Faatonu o le Lamepa. EFKAS.

FONOTAGA A KOMITI—IANUARI 2021

- Komiti Faafae Seminare — Ianuari 8, 9:00am
- Komiti Faamisionare— Ianuari 11, 9:00am
- Komiti a le Au Toeaina— Ianuari 12-14, 9:00am
- Komiti o Aoga— Ianuari 15, 9:00am
- Komiti o Feau Eseese— Ianuari 19, 9:00am
- Komiti o Tupe— Ianuari 20, 9:00am

O fonotaga uma e faia i luga o le ZOOM, e amata i le 9:00am taimi Amerika Samoa, i aso e pei ona ta'ua i luga. O sui o Komiti i Amerika Samoa nei o le a faaaogaina le potu fono i le Ofisa Tutotonu i Kanana Fou. A o sui o Komiti i atunuu e mamao, o le a fesootai mai i luga o le upega tafailagi. Mo sui o Komiti mai i Matagaluega i fafo e lei maua se faaaliga muamua mai le Ofisa Tutotonu mo ia fonotaga, faamolemole e manaomia ona resitala lou suafa i luga o le website a le Ekalesia: <https://efkasonline.org>.



Taulaga Seminare 2020

O le Aso Sa faai'u o le masina o Novema, o le Aso Sa lea ua faatulagaina e le Ekalesia Aoa e lafo ai le taulaga mo le Seminare. I le agaga vivii ma le faafetai i le Atua mo ana faamanuiaga, e fia tuuina atu ai le lisi o le faigataulaga mo le Seminare, o taulaga a 'aulotu ua mafai ona oo mai i le Ofisa Tutotonu. Talu ai aafiaga ona o le Koviti-19, ua tuai ai ona taunuu mai le taulaga a isi 'aulotu. Ae talitonu le manatu, e aumai pea e le Atua le laolao lelei, e faaoo mai ai taulaga a 'aulotu o loo taumafai mai pea. Faafetai tele EFKAS i lou faitaulaga auā galuega faatino a le Seminare Faafaifeau i Kanana Fou, o loo a'otauina ai fanau a le Ekalesia mo le galuega a le Atua i lumanai. Ia agalelei le Atua ma fa'atutumu mea uma ua outou fa'agaogaina ona o lana feau ma lana galuega.

<u>'Aulotu</u>	<u>Faifeau</u>	<u>Taulaga Seminare</u>
<i>Pulega Fale Ta'u</i>		
Faleasao	Iosefa Autele FT	\$ -
Ta'u	Ekitoa Sopoaga FS	\$ 500.00
Fitiuta	Kaimoko Lifuka FS	\$ -
<i>Pulega Luanu'u</i>		
Olosega	Lamese Fa'afili FT	\$ 2,100.00
Ofu	<i>avanoa</i>	\$ 500.00
<i>Pulega Vaifanua</i>		
Aoa	Fiti Aofia FT	\$ 4,600.00
Vatia	Afalupetua Utai FS	\$ 1,400.00
Tula	Sekuini Sevaaetasi FS	\$ 2,000.00
Onenoa	Siaosi Fale FS	\$ 1,000.00
Alao	Pesamino Tuitea FS	\$ 1,200.00
<i>Pulega Sa'ole</i>		
Amouli	Leatulagi Faalevao FT	\$ 1,500.00
Aunuu	Samuelu Tuilaepa FS	\$ 2,200.00
Alofau	Sanerivi Mulitalo FS	\$ 1,200.00
Auasi	Sapini Te'o FS	\$ 400.00
Utumea	Timoteo Esekia FS	\$ 2,015.00
<i>Pulega Sua</i>		
Afono	Kereti Faiiai FT	\$ 2,100.00
Masefau	Tafu Afusia FS	\$ 2,000.00
Laulii	Iakopo Seumalo FS	\$ 3,500.00
Fagaitua	Johnny Fano FS	\$ 3,000.00
Masausi	Isaako Matautia FS	\$ 2,380.00
Amatau	Aneli Fakafo FS	\$ 600.00
Sailele	Tautua Fuiava FS	\$ 915.00
<i>Pulega Fagaloa</i>		
Utulei	Ioane Evagelia FT	\$ 3,185.00
Fagaalu	Lalomauga Paau FS	\$ 2,100.00
Aua	Viliamu Leilua FS	\$ 4,600.00
Fagatogo	Iasepi Ulu FS	\$ 3,000.00
Gataivai	Tini Filisi FS	\$ 1,500.00
Pago Pago	Faafetai Faavae FS	\$ 3,000.00
Atuu	Sio Opeta FS	\$ 2,880.00
<i>Fa'aopoopo</i>	Poailii Fiasili Haleck	\$ 300.00

'AulotuFaifeauTaulaga Seminare***Pulega Itu'au***

Petesa Uta	Tusi Seanoa FT	\$ 1,000.00
Petesa Tai	Eleasaro Faataa FS	\$ 500.00
Matuu&Faganeanea	Fouvale Asiata FS	\$ 2,500.00
Fagasa	Waiana Tanielu FS	\$ 500.00
Nuuuli	Leituala Malieitulia FS	\$ 3,100.00
Ierusalem Fou	Paulo Lealaitafea FS	\$ 200.00
Ma'ama'a	Penieli Tela FS	\$ 1,000.00
Talalelei	Geoffrey Tagalao AKF	\$ 500.00

Pulega Tualauta & Leasina

Iliili	Tony Hollister FT	\$ 2,500.00
Aoloau	Semo Tapaleao FS	\$ -
Faleniu	Nepo Pu'a FS	\$ 2,000.00
Vaitogi	Tafa Muasau FS	\$ 5,000.00
Pavaiai	Reupena Alo FS	\$ 2,750.00
Aasu	Pito Simeavao FS	\$ 300.00

Pulega Tualatai & Aitulagi

Taputimu	Tautalatasi Fanolua FT	\$ 1,750.00
Malaeloa	Faigata Manase FS	\$ 1,000.00
Futigaga	Liusamoa Simolea FS	\$ 2,500.00
Vailoa	<i>avanoa</i>	\$ 2,000.00

Pulega Fofu & Alataua

Amaluia	Faaeteete Saifoloi FT	\$ 1,120.00
Poloa	Manuele Mataafa FS	\$ 500.00
Fagalii	Faalili Otineru FS	\$ 1,300.00
Amanave	Iese Aasa FS	\$ 1,700.00
Asili/Afao	Lisi Thompson FS	\$ 500.00
Fagamalo	Mathew Failauga FS	\$ 1,300.00
Nua & Seetaga	<i>avanoa</i>	\$ 2,150.00
Leone	<i>avanoa</i>	\$ 2,500.00

Pulega Hawaii Sasa'e

Kanana Fou HI	Falelua Lafitaga FT	\$ 3,000.00
Ierusalem Fou HI	Tafale Fuiava Jr FS	\$ -
Areto o le Ola HI	Fagalea Tua FS	\$ -

Pulega Hawaii Sisifo

MOAT	Kalasa M. Afuola FT	\$ 500.00
Waianae	Frank Papu FS	\$ 500.00
Hakimo	Sausau Faalevao FS	\$ 1,000.00

Pulega San Francisco

San Francisco	Kenape Eliapo FT	\$ 1,500.00
Sacramento	Salesa Faalau FS	\$ 800.00
Oakland	Ulysses Vee FS	\$ 500.00
Fa'afouina	F. Falepouono FS	\$ 300.00
Malamalama	Atiliai Tofaeono FS	\$ 300.00
Reno	Ula Aiono FS	\$ 200.00
Daly City	Alesana Eteuati FS	\$ 2,000.00
Stockton	<i>avanoa</i>	\$ -

Pulega Santa Clara

Epenesa Fou	Siausage Siamu FT	\$ 1,100.00
Monterey	Ieremia Aoelua FS	\$ 300.00
Tafatolu	Aliioaiga Filoialii FS	\$ 1,000.00
Sunnyvale	<i>avanoa</i>	\$ 260.00

EKALESIA

FAAPOTOPOTOGA

KERISIANO I

AMERIKA

SAMOA

<u>'Aulotu</u>	<u>Faifeau</u>	<u>Taulaga Seminare</u>
Pulega LA i Matu		
Ola Fou	Liona Thompson FT	\$ -
Oxnard	Gafoa Pulu FS	\$ -
Long Beach #1	Iosefa Papalii FS	\$ -
Fayetteville NC	Manaomia Tauanuu FS	\$ -
FOLA LV	Mika Kelemete FS	\$ -
Harbor City	avanoa	\$ -
SCC	avanoa	\$ -

Pulega LA i Saute		
Kanana Fou	Setefano Young FT	\$ -
Etena Fou LV	Ailao Tofaeono FS	\$ -
Fort Hood TX	Menise Sasa FS	\$ -
USC	Peniamina Taito FS	\$ -
FSCLA	Sepulona Tanuvasa FS	\$ -

Pulega Oceanside & San Diego		
National City	Suitulaga Faiiai FT	\$ 500.00
Witmann AZ	Tulafono Maga FS	\$ 1,755.00
Matagofie ole Atua	Salatielu Faletufuga FS	\$ 700.00
Emanuelu FV	avanoa	\$ -
Mesa Margarita	avanoa	\$ 250.00

Pulega Seattle		
Seattle VI	Aunuuu Vasega FT	\$ -
Seattle IV	Nofoaiga Moi FS	\$ -
Seattle I	Eteuati Toilolo FS	\$ 2,985.00
Seattle II	Kelekolio Kolo'i FS	\$ -
Ala i le Ola	Enoka Gatoloai FS	\$ -

Pulega USO		
SeaTac	Logovii Polu FT	\$ 500.00
Fort Lewis	Suipi Vaielua FS	\$ 1,300.00
Tacoma	Ulumoo Ale FS	\$ -
Portland	Stephen Tukumoeatu FSS	\$ 1,200.00

Pulega Alaska i Matu		
Lupe ole Faaolataga	Eneli Kalifa FT	\$ 1,500.00
Alaska I	Sapati Sio FS	\$ 500.00
Faavae Fou	Edwin Galeai FS	\$ 1,000.00

Pulega Alaska i Saute		
Feagaiga Fou	Niutunu Faiupu FT	\$ -
Alaska V 1stLMS	Iotamo Falealili FS	\$ 1,000.00

Pulega Ueligitone		
Wainuiomata	Malaki Muaiava FT	\$ 1,896.00
Porirua	Ieremia Allen FS	\$ 455.00

Pulega Aukilani		
Wiri	Mafutaga Faaleaoga FT	\$ -
Ranui	Fonofili Toomata FS	\$ -
Papakura	Alosia Mikaele FS	\$ -
Otahuhu	Ioane Savali FS	\$ -
Mangere	Kitiona Nanai Vai FS	\$ -
Waitakere	Sakaria Kuini FS	\$ -

<u>'Aulotu</u>	<u>Faifeau</u>	<u>Taulaga Seminare</u>
Pulega Ausetalia		
Alofisa o le Atua	Nofoaga Onesemo FT	\$ 1,000.00
Kanana Fou	avanoa	\$ 824.00
Taulaga Faaopopo:		
DMV-Virginia	Apisaloma Toleafoa FS	\$ 500.00
<u>AOFAI—\$125,670.00</u>		

E to'atele pea nisi o 'aulotu e lei oo mai a latou faiga-
taulaga mo le Seminare i le Ofisa Tutotonu. Pau ia o taulaga
ua taunuu mai, e pei ona ta'ua i luga. Afai o i ai se 'aulotu i
fafa sa lafo mai lana taulaga i le meli ae le o lisa atu i luga,
masalo toetiiti taunuu mai, ona ua faatuaituai lava ona
taunuu mai le meli i Amerika Samoa ona o le Koviti-19. E
tatau ona i ai se *tracking number* o le meli sa lafo mai, e
mafai ona su'esu'e ai poo taunuu mai. O loo avanoa pea le
Ofisa Tutotonu mo taulaga e lei faaooina mai. O loo lu-
manai nei le fono a le Komiti a le 'Au Toeaina e faamaonia
ai le lisi o faigataulaga o lenei tausaga. Faafetai Ekalesia le
faitaulaga i lenei tausaga mo le Atua ma lana galuega.



LAUGA



Tusi Faitau: OT: Isaia 7:1-15

Matua: Isaia 7:14 "O le mea lea e tuuina mai ai e le Alii le
faailoga ia te outou. "Fa'auta, e to le taupou, ma fanau mai
se tama tane; na te fa'aigoa foi ia te ia o Emanuelu."

A masina le tagata i se fa'amoemoe e fa'atino soo, e i ai
le popolega, ne'i alu a'i alu a'i le fa'atinoga o le fa'amoe-
moe sesē lona fa'amamafa, mai le mea sa amata mai ai. E
fa'apena se lagona ua i ai le Kerisimasi i nei ona aso. Talu
ai o le vaitau e fa'amanatu pea i lea tausaga ma lea tausaga,
e i ai le popolega, i alu a'i alu a'i galo le uiga moni na amata
mai ai le Kerisimasi mai le amataga.

O le manatu e fia tu'uina atu tatou te mafaufau fa'atasi i
ai i lenei vaitau, o le fesili: "O le a tonu le uiga moni o le
Kerisimasi?" Mo oe lava ia o le tagata Kerisiano faatuatua,
"O le a tonu le uiga o le Kerisimasi?"

E tāua le fesili, auā o lau tali, e iloa tonu ai poo fea o
pa'u ai lou fa'amamafa. E tāua foi le fesili, auā e talitonu le
manatu, e tofu lava le tagata ia ma lana tali. A tatou fesili i
le fanau iti, o le uiga o le Kerisimasi e ta'ua ai Santa Claus
ma la'au Kerisimasi ma mea alofa o le a maua. Mo le tupu-
laga talavou, o le vaitau o fiafiaga ma tafaoga. Mo le 'au
mātutua, o le vaitau e mafuta ma feiloa'i ai ma fanau ma
aiga. Mo le 'au ti'eti'e ta'avale, o le Kerisimasi o le vaitau e
fa'asavili ai i le ta'avale i le afiafi ma matamata ai i moli
'emo'emo ma moli felanulanua'i i luga o le auala. A fesili
foi i se tagata fai-pisinisi, o le Kerisimasi o le vaitau e tele ai
tupe maua i tagata fa'atau. O le uiga o le manatu, e taofi
'eseese tagata i le uiga o le Kerisimasi i nei ona aso.

Peita'i, talu ai o le Kerisimasi na afua mai i le tapua'iga fa'a-Kerisiano, e tatau i le tagata Kerisiano ona malamalama ma teufatu lona uiga moni o mai le va'aiga lava ia fa'a-Kerisiano. E pei ona silafia, na amata i Peteleema. Amata i le pepe fou ua fanau mai i le fale o manu; o Maria ma Iosefa, le 'au Makoi ma le fetu pupula mai le itu Sasa'e, o leoleo mamoe ma le pepese fialia o le 'au agelu i le lagi. O tala ia o le Kerisimasi tatou te maua mai i le molimau a le 'Au Faievagelia o le Feagaiga Fou. A o le fatu lava ia o le Kerisimasi, na toto i le Feagaiga Tuai.

A o le'i fanau mai Iesu, ua leva ona valoia e le 'au perofeta o le Feagaiga Tuai le fanau mai o se pepe. E le o ta'ua e le 'au perofeta le igoa o Iesu. Ae pau le fa'amatalaga a le 'au perofeta, e i ai le tama o le a fanau mai. O le perofeta o Isaia e maua ai le tele o valoaga ia. Ma o le fuaiupu lea ua avea nei ma a tatou matua, o le isi lea perofetaga a Isaia o loo valo'ia ai le fanau mai o le tama lea, *"Fa'auta, e to le taupou, ma fanau mai se tama tane; na te fa'aigoa foi ia te ia o Emanuelu...ua ia te i tatou le Atua."*

O le valoaga lea a Isaia o loo fa'aaoga fa'apitoa e le faievagelia o Mataio, e fa'amatala ai le fanau mai o Iesu. Ae peitai, e silia ma le 700 tausaga e va a'i le taimi na galue ai le perofeta o Isaia, ma le taimi na fanau mai ai Iesu. Afai tatou te fia malamalama i le uiga o le valoaga a le perofeta, e tatau ona tatou tagataga'i sa'o lava ia Isaia ma lona vaitau, e saili ai poo le a le mafuaaga ua ala ai ona vavalalo le perofeta i upu ia. Pau lena o le aualea e mafai ona tatou manino ai i le uiga moni o le Kerisimasi i lona afuafua mai, ma le feau o lo'o afifi mai i totonu o le valoaga a le perofeta.

E le faigofie le vaitau sa soifua ma galue ai le perofeta o Isaia. Le vaitau a o avea A'asa ma tupu o Iuta, i le laumua i Ierusalem. A o le vaitau foi lea sa vevesi ai faigamalo o le lalolagi, ina ua tula'i mai le malo o Asuria, e fia sii taua i le malo o Aikupito. O Asuria e tu i le itu i Matu o Ierusalem, a o Aikupito e tu i le itu i Saute. Afai e sii taua Asuria ia Aikupito, e tatau ona ui mai Asuria i le tele o isi malo laiti o loo tu i le ogatotonu. O malo laiti ia e aofia ai le malo o Suria, ma lona laumua i Tamaseko, le malo o Isaraelu ma lona laumua i Samaria, fa'atasi ai ma le malo o Iuta ma lona laumua i Ierusalem, lea e nofoa'i ai le Tupu o A'asa.

Ina ua logo tala malo laiti ia i fuafuaga a Asuria, fefefe loa ma atuavale. Ua fefefe auā e leai a se isi malo e mafai ona fa'afetauia le mata'utia o le malosi fa'afitafita o Asuria i na ona po. O le mea lea na osifeagaiga ai loa Resina, le tupu o Suria, ma Peka, le tupu o Isaraelu, e tutu fa'atasi ma so'o fa'atasi a la vaega 'au, e tau ma Asuria pe a o'o mai. Peita'i, silafia lelei e Resina ma Peka, e le lava lo la malosi so'o fa'atasi e tete ai Asuria. Ona alu lea o le savali ia A'asa ma le malo o Iuta, e fa'atosina mai e so'o-tolu a latou malo, atonu e lava lena e fa'afetauia Asuria.

Peita'i, e alu atu le savali, ae tete mai e A'asa. Ona faasaga mai lea o Resina ma Peka, ua sii taua ia A'asa, ma si'o le laumua o Ierusalem. Ua le iloa nei e A'asa le mea a fai. Fa'i o le malosi fa'afitafita o Asuria ma ana vaega 'au e toeitiiti taunuu mai, a o lea foi ua i le faitoto'a vaega 'au a Resina ma Peka, ua mananao e aveese A'asa mai le nofoalii. Manatu A'asa, e lua lava mea e mafai ona filifili ai e fo'ia ai

lenei fa'afitauli. Muamua, e mafai ona 'au atu i le mea o loo mananao ai Resina ma Peka, ma so'o-tolu fa'atasi o latou malo, e tete'e atu ia Asuria. Lua, lafoa'i Resina ma Peka, ae saili fesoasoani ma ifo 'au ia Asuria.

O le tulaga lea o lo'o fa'amatalaina i le mataupu e 7 o Isaia; o loo fefulisa'i fa'ala'au mamafa i le finagalo o A'asa poo le a lana filifiliga o le a fai: pe 'au atu ia Resina ma Peka, pe ifo 'au atu ia Asuria. Ae sau le perofeta o Isaia, ua faailoa ia A'asa, e i ai ma le mea lona tolu e mafai ona filifili ai—ia tumau i le Atua. 'Aua le so'o-fa'atasi ma Resina ma Peka; 'aua foi le saili fesoasoani ia Asuria; ae tumau; 'aua le fa'agaetia—tumau i le Atua. O le fa'aילו na ave e Isaia ia A'asa e mautinoa ai o lana filifiliga sa'o lea, e atagia i upu ia ua avea ma a tatou matua, *"Fa'auta, e to le taupou ma fanau mai se tama tane na te fa'aigoa foi ia te ia o Emanuelu ua ia te i tatou le Atua."*

A tatou vaavaai la i mea uma ia o lo'o tutupu i totonu o le mataupu e 7, aemaise le taimi na vavalalo ai le perofeta o Isaia, e mafai ona tatou manino ai: e le o le taupou o le a fanau le fa'amamafa a le perofeta; e le o le tamaititi foi lea e e fanau mai; a o le igoa o le tamaititi, o Emanuelu...ua ia te i tatou le Atua.

O le tulaga lea e 'ese'ese ai Isaia ma le tala o le Kerisimasi i le Feagaiga Fou. I le fa'aaogaina ma le fa'amatalaina e le 'Au Faievagelia o le perofetaga lea a Isaia, e fa'amamafa le taupou ma le tamaititi lea e fanau mai. Ae mo Isaia lava ia, e pa'ū lona fa'amamafa i le igoa o le tamaititi—Emanuelu, ua ia te i tatou le Atua. O le fa'aילו lea na ave e Isaia ia A'asa, ina ia mautinoa ai le Tupu, o lana filifiliga sa'o e tatau ona fai, ia tumau i le Atua. 'Aua ne'i 'au atu ia Resina ma Peka, auā e i'u lava i le fa'aletonu. 'Aua foi ne'i saili fesoasoani ia Asuria, auā e toe tigaina ai lava i se taimi o i luma. Ae tumau, 'aua le fa'agaetia, tumau i le Atua. AISEA? *"Emanuelu...ua ia te i tatou le Atua."*

O le feau lea a Isaia o loo afifi mai i upu o lana perofetaga. A o le feau foi lea o loo taoto ai le uiga moni ole Kerisimasi. A tatou taga'i i le tulaga e mafua ai upu a le perofeta, ona tatou manino lea, e leai a se eseese o tatou ma A'asa. Auā o le lalolagi lea tatou te ola ma soifua ai, e le iloga le mau fa'aletonu e tutupu mai. Tele fita ma faigata e fesouaina ai lo tatou ola. Tele mea e fa'apopoleina ai o tatou mafaufau i lea aso ma lea aso. E sau mai luma, sau mai i tua, ona pei lea o A'asa, ua tatou le iloa poo le a le mea a fai.

A o le matagofie lena o le feau e pei ona molimoli e le perofeta: poo a fa'aletonu e tutupu i le soifuaga, poo a fa'afitauli e tulai mai, afai e fesouaina lo tatou ola i se tulaga ua tatou leiloa ai le mea a fai, tumau i le Atua, 'aua le faagaetia. AISEA? Emanuelu...ua ia te i tatou le Atua.

Ae manatua foi, o le Emanuelu, o le fa'aילו lea na ave e Isaia ia A'asa. A o le fesili, o le a se fa'aילו mo i tatou e mafai ai ona tatou mautinoa ua ia te i tatou le Atua? O le fesili lena e tali e le Kerisimasi, e pei ona tatou sauni e fa'amanatuina. O le fanau mai o Iesu le pepe o le Kerisimasi, o le faailo lena mo i tatou, tatou te maua ai le mautinoa, po'o a fa'aletonu e tutupu mai i le soifuaga, poo le a le tele o mea e fa'apopoleina ai o tatou mafaufau, ia tumau i le Atua, aua Emanuelu...ua ia te i tatou le Atua. Ia manuia tele le Kerisimasi ma le Tausaga Fou, Amene.

MAFAUFAUGA FAALEAGAGA

“O LE TAIMI”

O ta’iala a le Tusi Paia ua fa’atāuaina e le Lamepa

Muamua:

O le taimi, ‘o le mea’alofa mai le Atua’, ‘the divine gift’. I aso uma, i vaiaso, i vaiata, fa’apea ai le tausaga atoa i lo tatou ola, o lo’o atagia ai le Atua o lēna na faia mea uma (Kenese 1:3-2:3, Levitiko 23, Salamo 74:16). O le Atua fetalai ia malamalama, ona malamalama ai lea; ua fa’apea ona avea le Aso fitu, o le Sapati lea i le Atua e tapua’i ai; o Tausamiga e faia e potopoto ai i tausaga fa’apitoa e manatua ai ma vi’ia ai le Atua; o le vala’au a le tagata i le Alii o lo’o ia te Ia le ao, ma le po, o O’e lava na e saunia le malamalama ma le la.

O le taimi e lē o se mea na faia e le tagata, e lē fa’atalia fo’i i le tagata. Ua a’oa’o mai Iesu i le fa’ataoto i le tagata mau’o’a, na manatu o lea fa’apea ona faia mo ia i le lagi peita’i, e le fa’apea ona fai (Lk 12: 16-20). O le taimi, ina ia fa’atino ma le fa’aete’ete, fa’apea le fiafia e taulimaina o mea’alofa mai le Atua peita’i, e faigatā peā fa’atinoa i o’u lava manatu, e pei ona fa’ailoa mai e le Faataoto 19:21, ‘E tele mafau’au o lo’o i le loto o le tagata; a o le pule a le Atua, e tumau lava lea’.

E fa’apea foi i la tatou gagana, ua fa’alaina i tatou ina ia tautala i le upu o le ‘**spending**’ (‘o le tu’uina atu po’o le fa’asafua atu o seleni mo le atina’eina o se pisinisi’), ‘**investing**’ (‘ia tuuina atu o seleni i le ‘au fai pisinisi mo le atina’eina o pisinisi, ma ia toe totogi mai ma saga fa’atupui-na ai le tamā’o’aiga’) ‘**buying**’, (‘ia fiafia e fa’atau mai, ma fa’atau atu, i mea ua faia’), fa’apea le ‘**saving time**’, (‘o le fa’atau o le taimi), o le **gagana o lo’o faava’e i le tamā’o’aiga ma le fe-fa’atau’iga**. O le va’aiga fa’a-tusitala, ua aunoa ma le fa’atauaina o tatou taimi, e pei o le mea’alofa a le Atua ua tu’uina mai mo’i tatou, a ua tatou manatu ina ia fa’atula’i le tamā’o’aiga i auala vavave.

E fa’apea fo’i le va’ai i lo tatou si’osi’omaga, o le fa’atāuaina o le soifua atia’e peita’i, ua fa’atamai’a o mea ua aumaia e le Atua mo le tagata. Ua lē va’aia le tagata i mea’alofa fa’aauau i le **quality**, a ua filifili i le fa’ateleina o le **quantity**. O se fa’ata’ita’iga, o le fale fa’afaigaluega ina ia tele tagata faigaluega, fa’apea le tamā’o’aiga peita’i, soo se mea e fa’atinoina, e iai ona a’afiaga, ua pusapusa ane i luga le asu palapala mai le falegaosimea, ua sao atu le malosio o le uila ma ua fa’aleagaina ai le ‘ofu o le lalolagi, ua pūpū le ‘ofu ua o’o mai ai ave malosio o le vela o le lā, lea ua vevela lo tatou lalolagi, ua vēlasia le ‘aisa mai matū ma saute, ma ua si’isi’i ai le oō oō o le tai, ma ua aga’i ina goto atu lo tatou lau ‘ele’ele. O leā sau va’aiga i ia mea? O va’aiga fa’a-saianisi i lo tatou lotoifale, e aga’i ina goto atu o tatou laufana i le o’o mai o le tai, i se va’aiga fa’aonopo nei.

E tāua tele le toe va’ai i le mea’alofa a le Atua ua tu’uina mai, pe nofo i le faleo’o, po’o le fale papalagi, o le fale, e iloa ai lou tagata. E sili le ola mamā, pe faleo’o, a’o ou togala’au ua puaina mai le manogi o le Atua silisili’ese, o le tūgamoni, o le laga’ali, o le mosooi ua manogi, o le la’usi e tutuli ai a’itu, o le la’umaile e ‘ese le manaia pea e āsoa ma

ula ai, o si ou si’osi’omaga i ou ‘ele’ele ua totōina ai mea Lelei, o ulu ma fa’i ma ufi ma talo ma ta’amu ma esi, o lau fagaga i moa ma pua’a, o ou vaiata e te fa’amalu ai ma lou sami e fagota ai, o le popo e sali ma ‘ai ma avea ma suau’u, o atumauga o loo sosolo ai le pāsio, le ifi, fa’apea le ufi vao, sole, e mata’utia le silisili o mea’alofa ua tu’uina mai e le Alii, peā o’o fo’i ina tapua’i, e nonofo fa’atasi i le afiafi ma faia le lotu.

Lua:

E tusa ai ma le Afioga a le Atua, ‘**o ō tatou taimi ua faatu-lagaina’** (*our time is limited*), ua fa’ailoa mai e le Salamo 90: 10, le o’o atu i le 70 po’o le 80 sefulu le soifua o le tagata e ola ai. O le ola e fa’apea ona pu’upu’u, o lo’o i ai ma mafatiaga peita’i, o le olaga e fa’atau ai o filifiliga, ma le fa’atinoga o le loto fuatiaifoelele, i galuega taua ua vala’auina i ai e lo tatou Alii.

O le fa’aoso’osoga mo i tatou, ona o le soifua atia’e. O le faia lea o loans, o le tupe ua fa’amatu’u mai e ui ina e le’i maua o sou totogi. O lau kalena ua tupu i tai’ala ua fa’ataotoina. E u’i ina tele talosaga i le Alii ina ia ta’ita’ina o tatou ala peita’i, ua fa’atusa i tatou e le Aposetolo o Iakopo (4:13). ‘Fa’auta mai ia, o e fai ane, o le asō po’o taeao tatou te ō atu ai i lea a’ai, po o le tasi a’ai, ma fa’atau, ma maua ai oloa,’ - a’o lea ua fai mai le aposetolo (4:14) ‘a e lē iloa e outou se mea e tupu a taeao...’ O le va’aiga a le tusitala, sa tatau ona fa’apea atu le tagata, ‘o le finagalo o le Alii tatou te faia ai o ia mea’ peita’i, ua fa’ailoa ai le mitamita o le loto o le tagata na ia faia o ia mea.. O le mitamitaga ua lē iloa ai le Atua, o mafau’aua so’ona fai.

O mafau’aua mai le Tusi Paia, e taua tele le fa’ata’oto o polokalame e ta’ita’ia lou soifua, ia avea ma ta’iala lou iloa o ou aso e ma’ea ai ‘au galuega, ia fa’apea fo’i ona e manatua ta’iala e ta’ita’ina ai lou soifua ma vi’ia ai lo tatou Alii. So’o te taimi e vala’auina ai ina ua aulia le 70 sefulu, e alu ma le fiafia i le Atua, o lē na tausia ma fa’aauau le ola ma le loto fa’afetai.

Tolu:

O tala a le Tusi Paia, ‘**o taimi e sili ona ta’ua, fa’apea ai le faateleina o mea lelei’** (*time is regarded both in terms of quality as well as a quantity*) – E taua faia o le uati, e iloa ai le taimi e taunu’u ai i se fa’amoemoe. E fa’apea fo’i le Tusi Paia ma le fa’atauaina o le uati, e pei o le va’a e iloa ai le taunu’uga i se mea. E lē o fa’ailoa mai e le Tusi Paia le taimi taunu’u, peita’i, ua fa’ailoa mai e le Failauga, *o le mea ma lona tausaga i mea uma, ma ona lava po i mea uma lava i lalo o le lagi*. (Failauga 3:1). O tala, e ui ina le fa’ailoa mai peita’i, ua fa’ailoa mai o taimi taua e ona tupu, ma taunu’u lona fa’atinoga.

O le mea e sili ona taua i le va’ai a le tusitala - o le manatua o mea sili ona taua i le olaga, i lea aso, i lea vaiaso, fa’apea fo’i le tausaga. O taimi e mafuta ai o ulugali’i ma fanau ma talanoa ma fēfa’asoa’ai. O taimi e o’o atu i ai le fa’asoa i le tagata mafatia ua fia maua se fesoasoani. O le a’uga o le fa’amoemoe, o le toe va’ai i le taimi ua totoe i le olaga, fa’apea ona fa’ataunu’uina o le faamoemoe i le mea e tatau ona fai.

Fa:

Ia paleni mea uma ma lona fa'atinoga i le olaga i aso uma, (a balance should be struck between different aspects of daily life). O se faata'ita'iga, e pei ona molimau i ai Ioane (9:4) 'o le taimi e galue ai, ma le taimi e malōlō ai', ia paleni mea uma; Teuteronome 2:14, 'o le taimi e malaga ai, ma le taimi e mafuta fa'atasi ma tagata i 'ele'ele fa'apitoa,' ia paleni mea uma; Galuega a le aposetolo 20:7, Iakopo 2:15 – 17, 'o taimi e feiloa'i ai le 'au-fa'atuatua, ma taimi e fesoasoani ai i lē ua vaivai ma mafatia, ma fia maua se fesoasoani.

E ta'ua tele le moe ma le malōlō i le po, e pei o le Salamo 127:1-2, 'o le meaalofo a le Atua ina fialia ma tuuina atu i le Atua mea ua le faataunuaina i le tatalo'. Pe afai foi e lē fa'ata'uaina o le taimi ma le malōlō ae fa'atino pea o galuega, ua iloa ai lo tatou lē fa'atuatua i le Atua ma lana mea'alofo ua foa'i mai e malōlō ai.

E fa'apea foi ona foa'i mai le Aso sapatu e malōlō, ua faatino e Iesu le auala fa'aso'o, i le 'au-fa'atuatua le o'o atu o lona alofa i lē ua vaivai.

Lima:

E ao ina tatou iloa le ituaso faapitoa, special times, o le valaau ina ia tu'uese manatu uma, ina ia maua o fa'amanuiga mai le Atua, pei ona a'oa'o mai Iesu i le fa'ata'oto i le Luka 10:38-42. O le fa'ata'oto ia Maria ma Mareta, ua naunau fo'i Mareta e fa'atinoga galuega fa'afatu'aiga, ma o se mea lelei peita'i, ua a'oa'o mai Iesu e sili le mea taua ua faia e Maria, ina ua fa'alogologo i a'oa'oga a Iesu, na i lo o mea e tapenaina.

O le vala'au ina ia talia le avanoa fa'apitoa, e pei ona fa'ataua e Maria, o le vala'au e usita'i mo le avanoa ua tu'uina mai, e te le toe maua. O a'oa'oga a le Alii ina ia iloa le mea sili ona tāua, ina le avea i tatou ma tagata e so'ona fa'atalalē le mafaufau, a ia iloa le finagalo o le Atua, e pei ona vala'auina i ai.

O nai seuseu a le Tusitala, o le silisili'ese o le Atua ua fa'a'ailoa mai i lea aso ma lea aso, ma ia fa'atele ai lona vi'i-ga e fa'avavau, e ala ia Keriso Iesu. Ia manuia lau faitau.

Ativeni mai le Vaaiga a le Perofeta o Ieremia

I nei masina o lo'o faailoa ai tusitusiga mai le perofeta o Ieremia, o tusitusiga o le Ativeni, le fa'atalitali atu ma le loto fialia i le afio mai o lo tatou Alii. O ni mafaufauga loloto e manatua ai le nuu ua faagaloina le Atua peitai, o le Atua e faamaoni lona alofa e ala i le oo mai o le fetu, o le fa'aola mo tagata uma. O lea ua avea ma motuga'afa, e manatua ai tala i le soifuaga o lenei auauna, i lenei vaitau.

O Ieremia, o se tasi o Perofeta i le Feagaiga Tuai na tula'i mai i aso faigata i le talafa'asolopito o Isaraelu. Na fanau o ia pe tusa ma le 650 TLM, a ua aga'i atu ina fa'aiuiu le nofoa'iga a le Tupu o Manase, o le taimi ua fa'atetele ai le a'afiaga o le malō o Iuta, i taupua'iga fa'apaupau. O le tagata e tūpuga mai i le 'aiga ositaulaga i Anatota i le nu'u o

Peniamina. Na vala'auina e avea ma perofeta i le 626 TLM, o le tausaga na maliu ai le Sanerivi, o le tupu mulimuli ta'uta'ua o Asuria. O le tu'umalo o le tupu ua ave'esea ai le malosi o Asuria, ma ua toe maua e Iuta lona tutoatasi, o le taimi na maua ai le 'Tusi Tulafono' i le malumalu i le 621 TLM, lea na fa'aaogaina e le Tupu o Iosia, e fa'avaeai le toefuataina o ta'iala mo le tapua'iga. Ina ua tula'i mai le lagona o le ifo i tupua, lea na matua tu malosi ai Ieremia, ma folafola atu ina ia tumau i ta'iala mo le tapua'iga. Na fasiotia le Tupu o Iosia i le 608 TLM, e Niko le Aikupito ma ana vaega'au i Palesitina, ao taumafai e toe fa'atula'i le malosi o Asuria. O le vaitaimi o mea ua tutupu ua avea ma fa'afitauli na paū ai le 'malo o Ierusalem,' o vaitaimi ma oo atu ai o le upu a le Alii e ala ia Ieremia, ma sauaina ai o ia e tagata. Ua o'o atu Aikupito ma ave'ese Ioasasa, lē na tula'i e suia Iosia, ma tu'uina i ai Ioakima le atali'i o Ioasasa e tausia le nofoali'i, o le atali'i na suia uma ta'iala, e pei ona faia e Iosia.

O le taua na faia i Kakemisi i le 605 TLM, na fa'atoila-lo ai le malō o Aikupito e le malosi o Papelonía. E lei pine le tu'uina atu e Ieremia o tusitusiga ma valoaga ia Paruka, ma faitauina i le malumalu o nei tusitusiga (mtp 36). Na fa'aleagaina e le tupu o nei tusitusiga, ua fa'a'ailoa atu ma ua fa'alauteleina ua avea ai ma Tusitusiga i le tusi a Ieremia. Ina ua mavae le lua pe tolu tausaga, na lē fa'atinoa ai e Ioakima lona lagolagoina o Papelonía peita'i, na maliu o ia a'o lei taunu'u atu Nepukanesa ma ana 'au. O lē na tula'i mai e ta'ita'ia le mālō, o Ioakina, na fa'apea ona aveina i latou faapea ai le to'atele o nisi e agava'a mo le atina'eina o le malō o Papelonía, ae ma fa'apea ona tu'u i ai le atalii o Iosia, o Matatia (Setekaia) e tausia le nuu.

A'o lei paū le a'ai o Ierusalem e oo mai i le tafeaga lona lua, sa iai se fe'ese'esea'iga ai latou e lagolago le malō o Aikupito, faapea foi i latou e lagolago le malō o Papelonía e le 'aiga o Iuta, o lea na iloa tele ai Ieremia ma ana upu i lea vaitaimi, ina ia lagolago ma usita'i ia Papelonía ma lana fa'atinoga. Na feaga'i ma tagata na le fialia ia te ia, ma faitauina o ia o le tagata fa'alata, ona tu'uina lea o le auaunai le fale puipui, ma feagai ma māfatiaga ma le oti.

Ina ua paū le mālō o Ierusalem, na vala'auina o ia e Papelonía e avea ma tagata nu'u e pei ona faia i Misipa (Mizpah), i lalo o le ta'ita'iga a Ketalia. Ina ua tagata valeina Ketalia, na fa'afuaseia ma fefefe le fa'apotopoto o tagata Iutaia, ma sosola i Aikupito, ma ave fa'atasi ai ma Ieremia, ma o i'ina na maliu ai le auauna. O sa'afiafaga e manatua ai lenei auauna, o le tamaitiiti na iloa lona tamaitiiti na te le iloa ina tautala atu i tagata, a'o tagata o tupu o le nu'u, fa'apea ositulaga, o matai fa'apea le saofaiga a tina, o taulele'a, o tamaiti'i, faapea ai tagata o le nu'u, ua tapuai ma ifo ia Pa'ala. O le faita'aga, ma le mulilua, o le fāoa o mea totino a tagata, o le sāuina, fa'apea fua lē fetau i le 'au faioloa, o le matape'ape'a i fanua, fa'apea le lē fa'amaoni i le fa'atinoga o le amiotonu. E faia ma le iloa le mea sesē e le tataua ona faatino. O ia va'aiga, o lo'o oo mai i onapo nei, lea ua mafua ai le korona vaionusi 19.

E lua mea ua matauina e le auauna:

- (1) ua galo le Atua e ona tagata
 (2) faapea le lē faia o le amiotonu.

E fa'apea se va'aiga a le tusitala i lenei auauna, o le vaivai e foaina mai e le Atua le mana e faatino ai o lana galuega. O le upu lea a le Alii ia Ieremia, ia e ta'uta'u atu, 'a'ua e te fefe, ia folafola atu, o le amiotonu a le Alii e agatonu mo tagata uma, o le tagata o le paleali'i e fa'atinoa lona finagalo. O lea se lu'i mo i tatou? Ua vala'aina i tatou e fa'atinoa le galuega folafola a le Alii e tusa ma lona finagalo.

O lana galuega ua manatua ai i vaega se fa, mo lo tatou iloa.

1. Mai lona vala'auina e o'o atu i le toefuata'iga o ta'ia-lama mo le nu'u (626 -621 TLM)
2. Mai le toefuata'iga seia o'o ina maliu le Tupu o Iosia (621 – 608 TLM)
3. Mai le maliu o Iosia seia o'o atu i le tafeaga lona lua (608 – 586 TLM)
4. Mai le tafeaga lona lua seia o'o ina maliu

O lea ua tatou feagai ma le Ativeni, o le vi'iga ma le fa'atalitali i lo tatou Alii, o le Emanuele ua fa'atasi ma i tatou, o le Alii na fanau mai i le falepovi, o ana a'oa'oga ma ma vavega seia oo i lona maliu ma toetu mai i le aso tolu, o loo afio i le lagi ma faia le galuega fautua mo o'e ma a'u, ina fa'aolaina le lalolagi ma i tatou uma. O le tala lea a Ieremia i taiala e manatua pea.

E fa'apea fo'i se motuga'afa a le Lamepa mo ta'ita'i ua tula'i e taitaia le malō o Amerika Samoa, o le vi'iga ma le fa'afetai i le Atua ma lava tofiga. O le tatalo ina fa'atumu atu pea e le Atua le utu a le faimea, a'o alofaiva i fa'amoemoega lelei mo le manuia o tagata. O lea fo'i ua fa'amanatu mai e Ieremia o taiala lelei, e tautai ai feau ma galuega ua vala'auina i ai. Ia manuia tele le Kerisimasi ma le Tausaga fou i le alofa o le Atua.



TALA MAI LE SEMINARE FAAFAIFEAU I KANANA FOU

“O NAI SEUSEU MAI LE TA'IGAFI A LE PERESITENE”

Ua atu ē le tautai alii auā lele ua faaifo mālolo i punasausau e pei o le fetalaiga i le sa o Vaatausili, ae tu pea i le sega i ona ululā e tafa'i ma le filifili o tia vavau. Ua faaifo ai nei lupe na i le vaopuanea na faamāepa, auā ua uma ona tofi laau i fogaa le faapolo ma le faamua o le ATUA e tumua ma tumati'e lona alofa e talavavau. Ua tala pasina lenei tausaga ua tepa taumeasina le asō ae futiafu mou i maota i Talāmoa ma Lagituaiva, o lo tatou taeao fesilasilafa'i lenā le Ekalesia Aoao. Talofa, talofa lava.

E faatalofa atu i le aoao tetele o le Ekalesia Faapotopotoga Kerisiano i Amerika Samoa i lona taape ma le alala i itu e fia o Samoa faapea atunuu e mamao—Amerika, Niu Sila, Ausetalia, ma tafa o le kelope. Mālō le tapua'i, mālō le tu'i, faafetai i lou soifua tatalo ua tatou aulia manuia mai ai lenei

vaitau faai'u o le tausaga 2020, i le alofa ma le tausiga malu a le ATUA. E ui lava ina vāvāō le lalolagi ma aafia i le faama'i tūgā o le Koronavairusi, le ATUA faafetai o loo taupaletō'a pea le toovae, le pō o le fala ma le soifua auauna o lau Ekalesia ua tulu'iga manuia ai taualumaga ma faiva o lenei tausaga. E ui ina tauafiafi i tūgā lea ua ataata manū o le alofa e lē mavae o le ATUA. Lea ua lalāta le vai ava, toe o se ana ona tatou tuvae lea i le Kerisimasi ma le Tausaga Fou 2021. Ia tatou taunuu ma le agaga faafetai i le ATUA faimeasili ma ana mealofa o le ola ua tiuliulu ai lana Ekalesia i le galuega tala'i, le fatumanava o tatou faiva faaekalesia o le Talalelei. Mālō le tau, mālō le pale, ua mālō le a'e.

1. Malologa a le Kolisi – Kerisimasi ma le Tausaga Fou, 2020-2021

Ua sauni atu nei lau Kolisi Faafaifeau mo lana malologa puupuu, 2020-2021. Ua a'e manuia faiva o lenei tausaga aoga, e ui ina amata faaletonu ona o tapu ma sā o le Koronavairusi, na ta'imalaga lava le Agaga o le ATUA e faamalosi mai ma faatonufaiva auā o tatou tiute ina ia a'e manuia le tulu'iga o lenei tausaga. E ui foi o loo aumau pea nisi o le aufaigaluega i A'oa'o ma Faletua i atunuu e mamao ona o tulaga o iai nei le atunuu, o loo mafai ona mafuta ma 'auai mai i vasega ma lotu i luga o Upegatafa'ilagi (ZOOM). O loo talosia pea i latou uma i talosaga a le Lau-mua.

Lea foi ua sauni atu le Kolisi mo ana tapenaga faai'u o le tausaga. Ua toe lua vaiaso ona feagai lea o le Kolisi ma ana Suega Faai'u (*finals*) o lenei tausaga, 2020. E lagona lava le mafanafana o le Agaga o le ATUA i taimi uma, auā e moni ana poloaiga “**Ou te i ai ia te outou...e oo lava i le gataaga o le lalolagi**” (Mat. 28). Sa taumate i le 'ete ma tauilo i mafaufauga pe tua ma ni a lenei tausaga i lau Kolisi Faafaifeau ona o mea ua tutupu i le lalolagi ma taofia ai gasologa masani mo le tapenaga o le aufaigaluega. Faafetai le ATUA, lea ua tūlima tū i le tula le taualumaga a le Kolisi; ua tini tauao le sa sa faalagi o porokalama ma a'oa'oga a le Kolisi o lenei tausaga aoga. Le Ekalesia, o upu masani a le atunuu “E potō a le tautai ae sese lana atu i ama.” O le a se gagana ua lape po o se aga ua 'ela a le Kolisi, matou te faamālūlu atu. Ia vaea ni tala ma lealea ni lape o au auauna faatauvaa o galulue punonou i lau Kolisi Faafaifeau.

2. Masini Faatekanalosi mo le Faatunuuina o Vasega i luga o Upegatafa'ilagi

E pei ona ou ta'ua o loo iai fanau – A'oa'o ma Faletua – o loo aoga mai i atunuu e mamao ona ua lē mafai ona malaga mai talu ai tapu ma sa o le faama'i, tapunia ai auala o femalaga'iga. Faafetai atu i le Ekalesia i le faa'aupegaina o potu aoga o lau Kolisi i masini ma komepiuta e pei o *webcam, sound system, laptop, screens*, ma masini faatekanalosi o ona po nei ua mafai ona aoga mai ai A'oa'o ma Faletua o loo aumau i fafo i vaiaso taitasi mo lenei vaitau. O loo maua pea le fesoota'iga ma latou ia i vaiaso uma. Faamālō ma faafetai ia i latou uma o loo aoga mamao mai i le onosa'i ma le faapalepale ona o suiga ua i ai lenei vaitau

i a'oa'oga a lau Kolisi. Matou te tatalo pea ina ia aulia se aso e tatou te feiloa'i ai i le alofa o le ATUA.

3. Suega Ulufale 2021 – Novema 27-28, 2020

O Novema 27-28, na faataunuuna ai le Suega Ulufale a le Kolisi mo le ulufalega o le tausaga fou, 2021. E to'aiva i latou na fuafua mo leni suega: e to'afa (4) i Amerika SA moa ae to'alima (5) sui mai fafo i Amerika. E to'atasi le sui o iinei e le i 'auai i le suega ma ua le su'e mo leni tausaga. Pe afai e manuia uma le taumafai a sui ia ona maua lea o le aofa'i e to'avalu mo le tausaga aoga 2021. O latou ia e faamoemoe e a'e ia Setema 2021, pe afai e manuia a latou Ta'utinoga i luma o Tamā o le Ekalesia o fuafua mo le tausaga fou. O le taimi nei o loo faatali i suega mai fafo ina ia faamae'a lelei galuega a alii faiaoga i le togiina o suega ma faailoa atu i le Laulau ma le Komiti Galuega a le Au Toeaina, Samoa ma atunuu mamao.

E sa'afi pea le aufaigaluega a le Kolisi mo fanau a le Ekalesia e a'oa'oina i lana Kolisi Faafaifeau. E le ititi tapenaga a alii Faiaoga i tausaga uma i vasega o a'oa'oina i totonu o le Laumua auā le saunia o fanau a le Ekalesia mo le galuega. Le Ekalesia ou te lē selu atu. A e ou te vaai pea ma le alofa i le tapenaga tele a alii Faiaoga ia latou vasega auā fanau a le Ekalesia, o ni faiva ua maumau ona e to'aititi nisi ua aoga i ai.

O le ulufatu o tapenaga ma a'oa'oga a Kolisi Faafaifeau o le saunia o le faigaluega mo le Galuega Faafaifeau. Mo le EFKAS, o le a'oa'oina ma le faafaileleina o fanau a le Ekalesia mo le galuega o le tofi Faifeau Samoa (FS). O le misiona pupūla lena a lau Kolisi Faafaifeau i Kanana Fou. Ia a'oa'o ma saunia le faigaluega ia na maua metotia ma agavaa e talafeagai ia malamalama ai i le fe'au a le Tusi Paia, o tusitala i latou na tōmatauina ma faagaetiaina e le Agaga o le ATUA e tusi. O Kolisi Faafaifeau po o Kolisi Faama-taupusilisili e latou te a'oa'oina ma tapena fanau aoga ia iloa ona faitau mataupu o le Tusi Paia, malamalama i ata faatusa (*metaphor*), su'esu'e ma iloilo vaitau ma si'osi'omaga o tala, saili uiga o upu ma tala, e ala i le a'oa'oina o latou i mataupu faapenei—e.g. talafaasolopito o le ekalesia (*church history*), talafaasolopito o Isaraelu ma aganuu a le vavau (*history of Israeli and primitive cultures*), mataupu silisili (*theology*), su'esu'ega i le Feagaiga Tuai ma le Feagaiga Fou (*biblical exegesis*), gagana na tusia ai le Tusi Paia (*linguistic study*), galuega faufautua (*counseling*), su'esu'ega i le mafaufau (*psychology*), faaliliuga o tala a tusitala o le Tusi Paia (*hermeneutics*), lauga (*homiletics*), tōfā ma le faautaga (*critical thinking*), galuega faafaifeau (*ministry*), tapuaiga eseese i le lalolagi (*world religion*), ma le faafailelega o le tagata (*character building*), ma isi. E faauu le tagata mai le Kolisi Faafaifeau ua na iloa ma ia te ia agavaa e fesoasoani i le laugaina ma le a'oa'oina o le Talalelei ia Iesu Keriso. Peitai o agavaa ma le atamai fetuuna'i na faatamāoaiga ai e le Kolisi Faafaifeau e mafai ona faaaogaina mo isi faiva ma tiute eseese.

E le o tagata uma e faauu mai le Kolisi Faafaifeau/Kolisi Faamataupusilisili e avea ma Faifeau. To'atele nisi o le aufaigaluega o galulue i le mālō, tauto i le militeri ma faiga-

luega i nisi o sosaiete ma kamupani eseese. O le fesili, o fea na maua mai ai le tomai ua galulue ai i nei galuega ma matātā eseese? Na latou maua mai le Kolisi Faafaifeau. E ui e lē se Kolisi o a'oa'o ai le atamai mo galuega lautele ma isi, a o le agavaa ma le atamai na maua mai le Kolisi Faafaifeau ua fesoasoani i lana fetuuna'iga mo ana faai'uga, malamalama ai pe a faitau i ta'iala po o tulafono o galuega o galue ai, iloa ona fesoata'i ma talanoa atu i tagata, iloa ona faaaoga a'oa'oga a le Talalelei e faamāfanafana ma faalototele i isi, atoa ai ma le amio ua iai se suiga e fai ma faata'ita'iga i isi. Le isi lea tāua o Kolisi Faafaifeau a le Ekalesia e le o malamalama ai le to'atele. O loo i ai le taofiga masani ua na o mataupu tau i le Tusi Paia ma le Ekalesia o a'oa'o i Kolisi Faafaifeau. E moni lelei. A o le loloto atu o a'oa'oga ma le tapenaga o le faigaluega i totonu o Kolisi Faafaifeau e lē pau mai i le galuega Faafaifeau ma le Ekalesia a o tua atu. Le a'oa'oina o A'oa'o i Kolisi Faafaifeau na maua ai le tomai ma agavaa e galulue ai o Faifeau Fesoasoani (*Assistant Chaplain*) i totonu o le militeri ma falema'i. O isi ua avea ma ta'ita'i i galuega a le mālō e oo lava i totonu o le Fono Faitulafono. Na āfua ona maua agavaa ma le tomai faatagatafaigaluega ona o lona a'oa'oina i Kolisi Faafaifeau.

O le agaga e fia faailoa atu, ia faaaoga le Kolisi Faafaifeau a le Ekalesia mo fanau ma tupulaga o le atunuu. E lē ititi se tamāoaiga na faaalu e le Ekalesia i alii Faiaoga na tauivi ma finau i a'oa'oga auā lau Kolisi Faafaifeau; lea foi ua sauni atu isi mo a'oa'oga. E lē ititi! Ua latou ausia faailoga maualuluga o su'esu'ega i mataupu o le Tusi Paia, mataupu silisili, talafaasolopito, galuega faafaifeau, faapea fesoata'iga faafaufautua (*pastoral counseling and psychology*) ma maua le tomai mai le ATUA e a'oa'o le aufaigaluega ia lava saunia mo le galuega a le Ekalesia. O le tautua fauao ma faupo lenā na valaauina ma a'oa'oina ai alii Faiaoga auā le misiona tala'i ma le sa o le EFKAS ia sao i ma'au i le alofa o le ATUA.

O le matou tatalo ia faatupu atili e le Agaga i lotu o fanau ma soo se tasi ua fia ofoina atu le ola e aoga mo le Ekalesia auā lana galuega tala'i o le Talalelei ia Iesu Keriso. O le atamai ma agavaa e maua mai Kolisi Faafaifeau e faaaauu i nisi o faiva ma galuega e ese mai le Ekalesia pe afai o le faamoemoe ia aoga mo isi faiva ese. E talosaga atu pea ma le agaga maualalo i le aufaigaluega galulue i nuu ma aulotu ia tatou galulue felagolagoma'i e logologo puialii i fanau ina ia faaosofia lotu ia aoga mo le Ekalesia. Pe afai foi e le o i ai se manatu e tautua i le Ekalesia e talafeagai lava a'oa'oga i Kolisi Faafaifeau mo se isi faiva po o le suiga o le olaga. Ua alualu pea i luma tulaga taualoaina o lau Kolisi i porokalama ma mataupu faalemafaufau ma le mataupu silisili o a'oa'oina ai.

Mo lou silafia, o aoga a le lotu na faavae ai a'oa'oga i le seneturi muamua i le talafaasolopito o le Ulu'a'i Ekalesia. E mulimuli mai nei aoga a le mālō a o aoga a le Ekalesia na amata ai le atunuu—Malua, Piula, Aoga a le Faifeau, Aoga Samoa, Autalavou, Au Taumafai, ma isi aoga a le Lotu. O le sao tāua o aoga a le Lotu (LMS) i le faavaeina o mālō faatemokarasi o Samoa o le Talalelei. E tau-

nuu mai Amerika, Peretania, ma Siamani i le faasi'usi'uga o le 19 seneturi ua malamalama le atunuu ua le toe i ai ni taua. Na ona o mai lava o atunuu nei amata a latou faiga faamālō i totonu o tatou laueleele auā ua nonofo faatasi tagata Samoa, ua fealofani ma ua leai se toe faamaligi toto e pei ona soifua ai le atunuu mai le amataga a o le i taunuu mai le Talalelei E manatua le fetalaiga a lo tatou Alii o Iesu—"Ia tuu mai ia o tamaiti e o mai ia te a'u, aua le vaioa i latou; auā e faapei o i latou nei o e o i le mālō o le lagi" (Mat. 19:14). Taumafai mai pea tupulaga e faaoga le Kolisi Faafaifeau a le Ekalesia.

4. Faiaoga o le Kolisi ua Faamanuiaina Porokalama i A'oa'oga.

Ua gasolo lelei pea le taumafai o le aufaigaluega i alii Faiaoga o lau Kolisi Faafaifeau. Ua faamanuiaina le porokalama a le susuga i le Faifeau ia Pasesa Sapolu i le faailoga o le Doctor of Philosophy (PhD), Feagaiga Fou. O ia o le sikolasipi a le Ekalesia na tuuina atu mo le amataina o lana porokalama i le 2014. Faafetai ua faamanuiaina.

O le alii Faifeau ia Simi Mauga, Sui Peresitene, ua faamanuiaina foi lana porokalama i le faailoga o le Doctor of Ministry (D.Min.), lana faamamafa o le Galuega Faafaifeau (Ministry). Na amata lana porokalama i le vaitau mafanafana (summer), tausaga e 2016. O le porokalama lea sa faia lava i le vaitau mafanafana i Hawaii mo vaiaso e lua, i tausaga ta'itasi, mai le 2016-2020. Ua faapea foi ona faai'u manuia le porokalama a le susuga i le alii Faifeau ia Fepuari Logoleo i le faailoga ma le porokalama lava lea o le Doctor of Ministry (D.Min.); lana faamamafa o le Mataupu Silisili (Theology).

O loo i ai foi nisi o sui mo le porokalama faafiaoga a le Kolisi o loo a'otau i le Kolisi Faafaifeau i Fiti (Pacific Theological College). O susuga i A'oa'o ia Etele Falealii ma Yonah Muasau i le porokalama a le Master of Theology (MTh), ma le alii Faifeau ia Ioelu Onesemo i le porokalama a le Doctor of Philosophy (PhD). Ia talosia pea i latou ina ia tau manuia le faamoemoe auā le Ekalesia i lana galuega ia lava taoso ma 'oloa luuluu le aufaigaluega i faiva eseese i le mafaufau, tino, ma le ola faaleagaga.

5. Asiasiga a le SPATS Accreditation Commission: Novema—Tesema 2020.

O loo faagasolo nei tapenaga a lau Kolisi mo le asiasiga ina ua latalata ina atoa le 5 tausaga talu ona asiasi ma pasia ana porokalama mai le tausaga e 2016. E ta'iono tausaga e tuuina mai pe a pasia le asiasiga a le Kolisi. Peita'i ua a'e se manatu ia te a'u ma susuga i alii Faiaoga ina ia faagasolo loa tapenaga o le asiasiga a le Kolisi i le tausaga lenei, 2020 ae le i oo atu i le tausaga fou, 2021, e pei ona faatulaga ai. Ua matou manatu o lea ua taoto lelei le Kolisi i ana porokalama ma le tapenaga mo le asiasiga. E lē o mautinoa lelei foi tulaga o i ai nei le lalolagi i le faama'i ma mea e tutupu i le lumana'i. O faiva a o taumatega ma tauiloga o faia nei auā e lē o iloa tonu le ata o lea tausaga fou. E tasi le mea ua matou mautinoa ua tapena le Kolisi mo le asiasiga a sui o le Komisi o Aoga a le Pasefika mo tatou. O le isi tulaga ua mautinoa e

le mafai ona malaga mai le Komisi e asiasi Kanana Fou ona o tulaga o i ai nei le atunuu ua tapunia alavaa ma fesoota'iga ma le usoga i Samoa.

Peita'i o le taimi nei o loo faia pea a matou fesoota'iga ma le Ofisa Tutotonu o le SPATS o i Fiti i luga o Upegatafa'ilagi. Ma e foliga mai o le a faataunuuina lenei asiasiga i luga o Upegatafa'ilagi—ZOOM, e pei ona faataunuu ai le tele o fono mo lenei vaitau puipuia. O le tekanalosi lava faaonaponei ua faaogaina e faaali atu ai le tino mai o tapenaga i tusitusiga ma faamauga a le Kolisi e pei o ana i'ugafono ma ta'iala, porokalama a'oa'oina, tala o le tupe, faletusi, faleaoga, fale o faiaoga, ofisa, fanau aoga, aufaigaluega galulue a le Kolisi faapea le Komiti Faafae. O ia taualumaga uma o le a fesāga'i lava i latou ma matou e faamaonia i luga o Upegatafa'ilagi. Mo le silafia, e fai lava sina umi o le faiga lea ona o loo mamao ese latou ma tatou. Sa masani lava ona lua aso e asiasi mai ai e faatino a latou galuega ona foi lea. O lenei ua savali le lua masina o fai pea le fesoota'iga ma latou i le Ofisa Faaululu i Fiti, faapea ai ma sui sinia o le Samoa Qualification Authority (SQA) i Apia, ma sui mai Malua ma Piula. O latou uma ia o loo matou fesoota'i ma vaavaalua i le faagasologa o lenei faamoemoe ina ia manuia ma pasia mataupu a lau Kolisi Faafaifeau. E momoli foi le agaga faamalo ma le faafetai i le Sui Peresitene, Faatonu o Mataupu A'oa'oina (Dean of Academics) faapea le aiga o Faiaoga mo galuega ma tapenaga auā lenei faamoemoe taua mo le Kolisi.

E talosaga atu ma le agaga maulalo ina ia manatua ane ia outou tatalo lenei faamoemoe o lau Kolisi Faafaifeau i Kanana Fou. Faafetai.

6. Fale e "Tapena ma Taupule ai Faiva" o Faiaoga a le Kolisi

E fia afea i sa'u tala le agaga faafetai e tuuina atu i le Ekalesia, le Lauaufono ma le Komiti a Tamā o le Ekalesia i lau tōfā faatupu i le faatinoga o se tasi o I'ugafono a le Ekalesia (2010) ia fausia ni fale e alala ai Faiaoga o le Kolisi. O se mataupu ua leva ona taupule ma momoo i ai auā tapenaga a alii Faiaoga mo le a'oa'oina ma le faafailelega o fanau a le Ekalesia o autovaa mai e aoga i le Laumua. E nofo ae 'olo ona o fale o pulega o alala ai e fai ma fesiita'i ese i taimi o Fonotele. Faafetai o le a mafai ona faataunuu lenei I'ugafono ma toe faafou fale nofo o faiaoga atoa ai ma se fale fou mo faiaoga.

O le taimi nei e lima (5) fale o Pulega o faaoga e le aufaigaluega a le Kolisi. O loo ta'ito'alua alii A'oa'o i nisi o fale ona e faamuamua lava alii faiaoga. Pe afai e mautu fale mo faiaoga ona avanoa lea o fale mo A'oa'o. O le taimi nei o loo taofia i fafo nisi o A'oa'o ua fai aiga ona o le Koronavirusi. E mana'omia ni fale mo latou pe afai e taunuu mai.

O lea e momoli tele atu ai le agaga faafetai ma le faamālō, i le Lauaufono a Tamā o le Ekalesia, Komiti o Feau Eeseese ma le Komiti Tupe mo lenei galuega a amata. Ua leva ona tatou taumafai peita'i sa i ai lava nai faaletonu. E ui o lea, faafetai ua faailo i tia o manū e pei o upu, *E taa'alo a tama a o le uso*. Faafetai tele.

Upu Faai'u

E uma tala ae lē uma le agaga faafetai tele i le Ekalesia. E momoli atu le faamālō a le Kolisi i le Laulaufono a le Fonotele, Komiti a Tamā o le Ekalesia faapea le Komiti Faafae a lau Kolisi Faafaifeau. Faafetai le lagolago mai i lau Kolisi Faafaifeau. Se ua le 'ole lea! O le ta'ita'iga ma le faagaioiga o se Kolisi Faafaifeau e faigofie i le fesoota'iga latalata ma ona ta'ita'i. O le alii Peresitene ua na o se auauna na filifilia e Tamā o le Ekalesia ma le latou faatuatuga na te ta'ita'i ma faagaioi le sa o le Kolisi i lana faai'uga e talafeagai ma le vaai mamao. O faiva ia o tofiga o le alii Peresitene ua mataitūina e Tamā o le Ekalesia e manuia ai le Kolisi. O le galuega vaavaalua lena a le Peresitene ma alii Faiaoga – e ala i le faigaluega ma lana pitolaau e faatino ma tausisia. O se faaaloalo maualuga lea ua tuuina mai e Tamā o le Ekalesia e fili tupetua ai le Peresitene ma alii Faiaoga i le sailiga mālō a le Kolisi i le paolo o le latou faamalumaluga.

E taula la'u talanoaga i lenei Lamepa i le agaga faafetai i Tamā o le Ekalesia i lo outou faatuatua ma le toe filifilia o lo'u tagata faatauavaa e ta'ita'i ma faafofoe le sa o le Kolisi mo le isi lima (5) tausaga. E le uma le agaga naunau ia faaoga mealofa ma agavaa ua faamanuia ai e le ATUA auā le Kolisi Faafaifeau. Faafetai tele i lau pule ma lau faaaloalo. Ia faamanuia le ATUA. Soifua.

Rev. Dr. Moreli J. Niutatoa, *Peresitene*

TALA MAI LE AOGA MAUALUGA I KANANA FOU (KFHS)

E fa'atalofa atu i le Suafa manumalo o Iesu Keriso, lo tatou Alii Fa'aola, le Ao o le Ekalesia. Fa'afetai i le alofa o le Atua ua molioo mai lo outou soifua i le lagi e mama a'o lo outou punoua'i i feau ma galuega ua valaauina ai lo outou soifua tautua, aemaise le Atua ma lana galuega.

O se tala lenei mai lau aoga maualuga i lenei foi kuata. Ua mae'a atu le PTC o le kuata muamua i le masina o Novema. Se vaaiga ese foi le lolofi mai o matua i lena foi fa'aleaso ona o le fia iloa ma molimauina foi tulaga o alo ma fanau. Aua, e pei lava ona maitau e le aiga faiaoga le gaogao o matua i taimi fa'apenei ae a o'o loa ina afaina fanau i tulaga le manuia pe tutuli mai le aoga, ona vave lea o mai. Ae viia le Atua i lena aso ua toatele matua sa auai mai.

E fa'apena ona fa'amanatuina foi le Aso Fa'afetai i tulaga ese'ese e pei ona masani ai i mea taumafa, fa'aevage-lia, fa'afiafiaga ma ta'alogā ae fa'asilisili le viiga ma le fa'afetai i le Atua ona o lana pule fa'asoa ma mea uma ua la faia mo i tatou i aso ta'itasi. E momoli ai lava le agaga fa'afetai i matua ona o le lagolagoina o fa'amoemoe o fanau aemaise le gaosia o meataumafa sa fa'atinoina ai meaa ese'ese mai atunu'u sa vaevaeina ai vasega ta'itasi. E pei o le vasega 9 sa latou fa'atinoina Samoa, vasega 10 o Tonga, vasega 11 o Fiti ma le vasega 12 o Amerika. Fa'amalo fa'a-

fetai matua pele i fanau, aua o fanau o le lumana'i lea mo a taeao. O le aso 4 o Tesema, sa auai le JROTC Rifle Team i le tauvaga sa faia i Tafuna i le nofoaga o le ami fa'aleoleo. E ui lava e utiuti le taimi sa tapenaina ai lea fa'amoemoe ae sa fa'afiafiaina lava le loto ma le agaga ina ua tula'i mai le "Stallions" ma maua le tulaga tolu. Sa momoli foi le fa'afetai i le susuga i le faiaoga ia SFC Kodaro Ala ona o lea fa'aleaso taua aemaise alo ma fanau sa au ai.

Ua tatou tu lata nei i le fa'amanatuina o le aso soifua o lo tatou Alii Fa'aola, le pepe ole Kerisimasi. Ua saunia foi e lau aoga maualuga se polokalame masani e pei o tausaga uma, i le va'avaaiga a le vaega o le Musika ma le Christian living e ala lea i pesepesega fa'aleagaga ma pese kerisimasi masani fa'apea le tala o le kerisimasi e aofia uma ai vasega ta'itasi. O lenei foi tausaga ma lana polokalame o lo'o vaeluaina i ni vaega se lua: Vaega muamua ua fa'aigoaina o le "Emanuelu po Emmanuel" o lo'o tu'ufa'atasi ai vasega 9 ma le 10. Vaega Lua ua fa'aigoaina o "Noela po Noel" o lo'o tu'ufa'atasi ai vasega 11 ma le 12. O nei fuafuaga i le tu'ufa'atasiga ma le vaevaeina o vasega, ina ia maua ai e alo ma fanau aemaise le aiga faiaoga le agaga o le galulue fa'atasi ma le felagolagoma'i. Aua o lenei lava vaitau o le vaitau o le fefa'asoa'i, fetufaa'i fa'apea le nofo fealofani ae fusia i le alofa a'o tatou talia le fanau mai o le fa'aolataga. O lea fa'amoemoe o le a faia i le Aso Faraile, aso 18 i le 9 i le taeao i le faletaalo a le Ekalesia. O le aso foi lena e malo-lo ai aoga a le fanau i le tu'uaga o le lua vaiaso o le Kerisimasi ma le tausaga fou. E toe tala aoga a fanau i le aso 4 o Ianuari pe o'o atu ai le soifua maua ma le lagi e mama.

E avea ai foi lenei avanoa e fa'amanuia atu ai le Kerisimasi ma le Tausaga Fou i le mamalu ma le paia lasilasi i auauna tofofi a le Atua o lo'o nōnō manū i fata faitaulaga e fia, aua le Atua ma lona finagalo. Ia alofa le Atua ma puipui malu lo outou soifua ma si o matou ola. Soifua ona o Iesu.

Sinaitaaga G. Tufele, *KFHS Principal*

E LELEI MO OE

TATALO: O le laina e fesootai ai ma le Atua

I vevesi ma le pisi o le vaitau o le Kerisimasi ma le agai atu i le Tausaga Fou, e faigofie lava ona galo i ai tatou le mea taua e ao ona fai. O lea mea taua o le mafai ona tatou feso'otai ma le Alii e ala i le tatalo, ma o se mea taua lava i le olaga o le tagata. E le fa'atuai ona tatou manatu te isi ane lava, ma toe to manatu, pe na fa'apefea ona tatou aulia lenei Kirisimasi ma le agai atu i le Tausaga fou. E le o tuai ona e tu, manava, ma tatalo ia fesoasoani mai le Atua e fa'ataua i i lou loto ma lou mafaufau lona mafuta mai.

A'o tatou i ai i lenei vaitau tupulaga talavou, e le tau-mate, o le a tele ni filifiliga e o'o atu, ma o'o mai i o tatou mafaufau. O nei filifiliga, o le a avea ma ata fa'asolo e mafaufau pea lava i ai: O le a sau mea o le fai i lenei Kerisi-

masi ma lenei Tausaga Fou? O nisi o nei manatu o le a mafai ona ia ta'ita'i lou olaga i ni taunu'uga lelei. O nisi foi o le a tauau lava e mafai atu i se tulaga maualalo ma le vaivai manatu ma lagona e tutupu mai. A'o tatou savavali i totonu o lenei Kirisimasi, ma tatou tilotilo atu i lenei Tausaga Fou, e taua ai le i ai o se taimi lua te mafuta ai ma le Alii e ala i le tatalo.

Afai ua le mafai ona fa'amautu ou lagona, ma ua faigata ia te oe ona fai sau fa'aiuga taua, e ao ona tatou fa'asoa ma tatalo. Fa'asoa i lou tama, pe afai o oe o se alii, fa'asoa i lou tina, pe afai o oe o se tamaitai. O le tasi lea auala lelei ma le taua o le tatalo, e mafai ai ona tatalaina avanoa e mafai ai ona fa'asoa. Afai e le mafai ona e fa'asoa i ou matua, ia manatua le mea lenei, ia e fa'asoa i se tagata ua e fa'atu-atuaina, ma se tagata e mafai ona e maua ai ni lagona lelei ma le taua, aua le fausia o se ola lelei ma le solo manuia. E taua le mafuta i le Atua i le tatalo e maua ai manatu lelei, mafaufauga lelei, le loto lelei, ma le olaga mata'u i le Atua o le amataga lea o mea uma. E manaia foi ae tatou fa'ataitai i nisi nei o tatalo ua saunia e aofia ai uma lagona ma mafaufauga a'o tatou i ai i lenei vaitau o le Kirisimasi ma le Tausaga Fou.

Tatalo mo le Olioli

Tama Paia e, fa'afetai tele lava mo le meaalofoa o lou Alo o Iesu Keriso, lo'u Fa'aola. Le Ali'i e, e faigofie ona fa'amamafaina i le vaitau o le Kirisimasi, ma ou te mana'omia le fesoasoani e tumau ai pea ona fa'ataua lau Afio. A o folafola mai e lenei lalolagi le fiafia le tumau ma mea faalavafau, o le olioli moni e sau mai ia te Oe. Le Alii e, fesoasoani mai ia ou manatua le mea o fai mai ai le Tusi Paia, "Ou te fiafia i le Atua o lo'u olataga" (Sapakuka 3: 18b). Faatumu a'u i le fiafia moni o le iloina o Oe, ma le mauaina o se faia ma lou Alo, ma le mafua'aga o lona fanau mai, o lo'u togiola lea. I le suafa o Iesu ou te tatalo ai, Amene.

Tatalo mo le Alofa

Fa'afetai mo lou alofa tele ia i matou ua e foa'iina ai lou Alo e to'atasi e maliu mo a'u agasala. Le Ali'i e, ou te tatalo i lo'u olaga, e te fa'ateleina le alofa. Fesoasoani mai ia ou alofa atili i a'u uo ma aiga. A'oa'o mai ia te a'u ia ou alofa atu i tagata ese i le ala e te alofa ai. Ou te fesili foi i isi ia lagona lou alofa i lenei taimi o le tausaga pe a matou taula'i i le alofa silisili na e foa'iina mai ia i matou e ala ia Iesu Keriso. Fa'aalia nisi o vaega fou o lou alofa i lau ekalesia i le taimi o le Toe Afio Mai. Fa'aaoga ou so'o e avea ma malamalama o le lalolagi e susulu ai lou alofa. I le suafa o Iesu ou te tatalo ai.....Amene

Tatalo mo le Loto Filemu

Le Atua e, Fa'afetai ua e saunia le filemu e sili atu nai lo malamalama uma. E ese le manaia o le ola i se olaga e mafai ai ona ou liliu atu ia te oe pe a ou popole, le fiafia, pe a faigata le olaga. E ala mai i le perofeta o Isaia, na e faamautinoa mai ai ia i matou e faapea, "E te tasi ia te ia i le filemu atoatoa, o le ua faalagolago ia te oe lona manatu, aua ua ia faalagolago ia te oe" (Isaia 26: 3). Le Ali'i e, ia

taula'i i le filemu le lalolagi i le Kerisimasi, e ui ina toatele tagata e le tuliloaina Oe mo lenei filemu. Latou te taumafai i le malosi o le tagata e aumaia ai, pe faamalosi, le filemu i le va o tagata. Ae o Oe, Le Ali'i e, tu'u mai ia te a'u se loto filemu, ia fusia ai o'u uso ma tuafafine ia Keriso, fa'apea fo'i ma i latou e le'i iloa Oe. Ou te iloa e leai se filemu o le lalolagi se'i vagana ua e toe fo'i mai, ae ou te iloa e mafai ona e aumaia le filemu ia te a'u. I lou igoa ou te ole atu ai ma le lotomaulalo, Amene.

Tatalo mo le Fa'autauta

Iesu e, ao lata mai le tausaga fou, ua ou iloa o lenei taimi o le tausaga e tatau ona taula'i ia te Oe. A'o ou fiafia e teu-teuina mo lenei vaitau, ia saunia i matou mo le tausaga fou, fesoasoani mai ia te a'u ia aua le so'ona fa'atauaina o mea sese. Ou te mana'o e taula'i ia Oe, aiga, uo, ma tupulaga talavou. Taula'i pea lo'u loto ia te Oe, ae le o le feau ma mea masani i lenei taimi o le tausaga. Ia i ai lou ala i lo'u loto, Le Alii e. I le suafa o Iesu ou te tatalo ai, Amene.

Tatalo mo le Fa'alelei

Fa'afetai mo le auina mai o lou Alo e maliu i luga o le satauro ina ia mafai ona tatou toe fa'alelei ma Oe. Ou te iloa o a'u o se tagata agasala ua alu ese mai ia te Oe, ae ona o le oti ma le toetu, ua mafai ai ona ou maua se so'otaga ma lo'u Fa'aola. Le Ali'i e, ona o la'u agasala, ua ou iloa ai ua ou fete'ena'i ma tagata i lo'u olaga. E manino lava lau Upu, e tatau ona ou fa'alelei ma isi pei o a'u fo'i ia te Oe. Afai ua afaina se tasi ona o au, fa'aali mai ia te a'u ina ia mafai ona ou fa'atoese i lea tagata. Fesoasoani mai ia ou fa'amagalo ma aapa atu ia i latou o ita mai. Fesoasoani mai ia te a'u e fa'atino le leleiga na e fa'alateleina mai ia matou. I le suafa o Iesu ou te tatalo ai, Amene.

O le auala lea tatou te feso'otai ai ma le Alii, a'o tatou i ai i le fiafia ma le samiina o le fanau mai o Iesu le Tama na folafolaina. Tupulaga talavaou, ua tatou i ai i le vevesi ma le fafati mai o galu sina o suiga o le olaga. Ua tauau e tafea atu ai mo lo tatou fa'atuatua, ma segia ai fa'amoemoega lelei o lo'o e nofo ma oe. Ia manatu o le fanau mai o Iesu, ma le so'otaga ma le tatalo, o le feso'otaiga vavalalata lea e mafai ai ona tatou manino i le finagalo fa'aola mai o le Alii. Pe a o e mafatia ma le mautonu; pe a o filia oe i manatu ma mafaufauga le mautonu; pe a fai ua le mafai ona fa'asoa, po ua le mafai ona tufa ou tiga ma mafatiaga; ou te fa'amanatu ia oe, e mafai lava ona e toe nofo te isi ane lava i lalo, ma e mafuta i le Atua i le tatalo, ma ta'u i le Atua, ua e mafatia, ua e le mautonu, ua mamafa le avega. Sei e fa'amama mai, ma aumai le tonu, ma aveese mafatiaga, ae mafuta mai ma ta'uto'alua lo'u vaivai fa'atupulaga talavaou. Fa'ata'ita'i e faitau se tatalo o nei tatalo, e maua ai lou fesoasoani. Fai mai valoaga a le au Perofeta, 'Aua ua fanau mai mo i tatou le tama, e i lona ua le malo, o le faipule, o le Atua malosi.' Lona uiga, o ia e toomaga i ai mai faigata o le ola. Manatua, e lelei mo oe. Manuia le Kirisimasi ma le Tausaga Fou.

Saunia : Iese Faavaoga F.S.

Lisi o le 'Aufaigaluega Agavaa mo le Galuega Tausi 'Aulotu

O le lisi leni o le 'aufaigaluega i Faifeau ma A'oa'o Kanana Fou ua avanoa ma agavaa mo le galuega tausii 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau saili ni a latou fa'afeagaiga. O suafa ia, e le gata o le 'aufaigaluega o loo galulue nei mo le Ekalesia Aoa o Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai o latou suafa e Failautusi o Pulega ta'itasi. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoa o le imeli: gen-sec@efkasonline.org, e fa'alauiloa ai lou suafa i le taimi e toe lolomia ai le Lamepa.

Seminare Faafaifeau i Kanana Fou:

*Dr. Moreli Niuatoa FF, *Peresitene*
 *Fepuari Logoleo FF
 *Palenapa Mataafa FF
 *Luuao Leasiolagi FF
 *Faletoi Aofia FF
 *Romeo Isaia Seiuli FF
 *Sasa Satoa FS, *Bursar*
 *Gatai Patu AKF, *Librarian*
 (* e fa'amaonia e le 'Komiti a le Au Toeaina)

Ofisa o A'oa'oga Kerisiano:

Setefano P. Lefale FS, *Fa'atomu*
 Soosoo Tuiolomutu FS
 Segala Ifopo FS
 Vili Polikapo FS

Lamepa:

Iese Faavaoga FS
 Edward Semaia FS

Ofisa Failautusi

Lancaster Allen AKF

A'oga Maua'uga i Kanana Fou:

Uaea Satele FS
 Bennet Muasau AKF

Pulega Fale-Ta'u:

Ioane Ioane AKF (Fitiuta)

Pulega Itu'au

Tavita Mailoto FS (Ma'ama'a)
 Poasa Maui FS (Petesa-Tai)

Pulega Sa'ole:

Setefano P. Lefale FS (Auasi)
 Vili Polikapo FS (Amouli)
 Edward Semaia FS (Aunuu)
 Siavao Iese AKF (Alofau)

Pulega Vaifanua:

Eteuati Toma FS (Onenoa)

Pulega Tualatai:

Sega Ifopo FS (Vailoatai)
 Uaea Satele FS (Vailoatai)
 Daru Ulutu FS (Mala'eloa)
 Sinaka Ulutu AKF (Mala'eloa)

Pulega Alataua:

Rossetti Faamausili FS (Nua Seetaga)
 Tasele Tuigamala FS (Leone)
 Soosoo Tuiolomutu FS (Poloa)
 Iese Faavaoga FS (Leone)
 Fetuao Mua AKF (Leone)
 Bennet Muasau AKF (Amanave)

Pulega Tualauta:

Kirifi Muao FS (Pavaiai)
 Taafua Taafua FS (Iliili)
 Lancaster Allen AKF (Vaitogi)

Pulega Sua:

Ioane Peleti AKF (Fagaitua)
 Simeona Ape AKF (Laulii)

Pulega San Francisco:

Moegagogo Tamasese FS
 Ketesemane V. Tagalao FS (Sacramento)
 Eliu Eseroma FS (Daly City)
 Safue Ulufalelupe AKF (Sacramento)
 Tupuivao Ioelu FS (Daly City)

Pulega Santa Clara:

Vai Malaulu FS (Tafatolu)

Pulega LA Saute:

Peniamina Sefo AKF (USC)
 Timothy Young FS (Kanana Fou)

Pulega USO:

Ieremia Tyrell AKF (Tacoma)

Pulega Seattle:

Savali Talalemotu AKF (Seattle II)

Pulega Alaska i Matu:

Vaimoso Pasia FS (Lupe Faaolataga)
 Stephen Taule'ale'a FS (Alaska I)

Pulega Ausetalia:

Oto Tumanu FS (Alofisa o le Atua)

Lisi o 'Aulotu Avanoa

O nisi ia o 'aulotu o le EFKAS ua avanoa, i le taimi na lolomi ai leni Lamepa, o le a ogā ai leni lisi e saili ai so latou faifeau:

- EFKAS Leone
- EFKAS Aoa
- EFKAS Masefau
- EFKAS Fagasa
- EFKAS SCC
- EFKAS Emanuelu,
Fountain Valley
- EFKAS Stockton
- EFKAS San Francisco
- EFKAS Alaska 1
- EFKAS Sunnyvale
- EFKAS Kanana Fou, Sydney